

四庫全書

經部

欽定四庫全書

經部

周易集註卷十三

詳校官太常寺少卿臣陳桂森

通政使司副使臣莫瞻菴覆勘

總校官檢討臣何思鈞

校對官中書臣宋枋遠

謄錄監生臣何炳然

欽定四庫全書

周易集註卷十三

繫辭上傳

明來知德撰

天尊地卑乾坤定矣卑高以陳貴賤位矣動靜有常剛柔斷矣方以類聚物以羣分吉凶生矣在天成象在地成形變化見矣

天地者陰陽形氣之實體也乾坤者易中純陰純陽

之卦名也卑高者天地萬物上下之位貴賤者易中卦爻上下之位也動者陽之常靜者陰之常以天地論天動地靜以萬物論男外而動女內而靜雄鳴而動雌伏而靜也剛柔者易中卦爻陰陽之稱也斷判斷乃自然分判非由人也方者東南西北之四方也方以類聚者以天下言之冀州之類與冀州相聚荆州之類與荆州相聚是也以職方言之南方之類與南方相聚北方之類與北方相聚是也物者萬物也

羣分者角之羣分別于毛毛之羣分別于羽羽之羣  
分別于裸是也吉凶即善惡以方言之中土四邊有  
腹裏邊方之善惡天下九州有君子小人之善惡以  
物言之牛馬則善虎狼則惡此皆陰陽淑慝之分也  
故吉凶生矣吉凶者易中卦爻占決之辭也此皆聖  
人仰觀俯察列于兩間之表表可見者故以一尊一  
卑一卑一高一動一靜一類一羣一形一象言之前  
儒以方謂事情所向恐不然矣象者日月星辰之屬

形者山川動植之屬兩間形象其中有往有來有隱  
有見有榮有枯有生有死千變萬化易中變化則陰  
之極者變乎陽陽之極者化乎陰也○此一條言天  
地萬物一對一待易之象也蓋未畫易之前一部易  
經已列于兩間故天尊地卑未有易卦之乾坤而乾  
坤已定矣卑高以陳未有易卦之貴賤而貴賤已位  
矣動靜有常未有易卦之剛柔而剛柔已斷矣方以  
類聚物以羣分未有易卦之吉凶而吉凶已生矣在

天成象在地成形未有易卦之變化而變化已見矣  
聖人之易不過模寫其象數而已非有心安排也孔  
子因伏羲圓圖陰陽一對一待陰錯乎陽陽錯乎陰  
所以發此條

是故剛柔相摩八卦相盪鼓之以雷霆潤之以風雨日  
月運行一寒一暑乾道成男坤道成女乾知大始坤作  
成物

八卦以天地水火山澤雷風八卦之象言非乾坎艮

震巽離坤兌也若舊註以兩相摩而為四四相摩而為八則將下文日月男女說不通矣八卦者剛柔之體剛柔者八卦之性總則剛柔分則八卦摩盪者兩儀配對氣通乎間交感相摩盪也惟兩間之氣交感摩盪而後生育不窮得陽氣之健者為男得陰氣之順者為女然成男雖屬乾道而男女所受之氣皆乾以始之成女雖屬坤道而男女所生之形皆坤以成之分之則乾男而坤女合之則乾始而坤終此造化



一氣流行之妙兩在不可測者也知者知此事也作者能此事也蓋未成之物無所造作故言知已成之物曾經長養故言作言乾惟知始物別無所知坤惟能成物別無所能此所以易簡也凡人之知屬氣屬魂凡人之能屬形屬魄故乾以知言坤以能言也大者完全之意譬之生人止天一生水也而二之火為心三之木為肝四之金為肺五之土為脾一身之骸骨臟腑皆完全備具矣蓋不惟始而大始也○此一

條言天地陰陽之流行一施一受易之氣也言天地萬物惟有此對待故剛柔八卦相為摩盪于是鼓雷霆潤風雨日月寒暑運行往來形交氣感男女于是乎生矣故乾所知者惟始物坤所能者惟成物無乾之施則不能成坤之終無坤之受則不能成乾之始惟知以施之能以受之所以生育不窮孔子因文王圓圖帝出乎震成言乎艮又文王序卦陰綜乎陽陽綜乎陰所以發此條

乾以易知坤以簡能易則易知簡則易從易知則有親  
易從則有功有親則可久有功則可大可久則賢人之  
德可大則賢人之業易簡而天下之理得矣天下之理  
得而成位乎其中矣

易知者一氣所到生物更無凝滯此則造化之良知  
無一毫之私者也故知之易簡能者乃順承天不自  
作為此則造化之良能無一毫之私者也故能之簡  
益乾始坤成者乃天地之職司也使為乾者用力之

難為坤者用力之煩則天地亦勞矣惟易乃造化之  
良知故始物不難惟簡乃造化之良能故成物不煩  
也人受天地之中以生其性分之天理為我良知良  
能者本與天同其易而乃險不可知本與地同其簡  
而乃阻不可從者以其累于人欲之私耳故易則易  
知簡則易從易知者我易知乎此無私之理也易從  
者我易從乎此無私之理也非人知人從也

下易字

難易之易

○此一條言人成位乎中也言乾惟知大始

是乾以易知矣坤惟能成物是坤以簡能矣人之所知如乾之易則所知者皆性分之所固有而無一毫人欲之艱深豈不易知人之所能如坤之簡則所能者皆職分之所當為而無一毫人欲之紛擾豈不易從易知則此理之具于吾心者常洽浹親就不相支離踈隔故有親易從則此理之踐于吾身者常日積月累無有作輟怠荒故有功有親則日新不已是以可久有功則富有盛大是以可大可久則賢人之德

與天同其悠久矣可大則賢人之業與地同其博大矣夫以易簡而天下之理得成賢人之德業則是天有是易吾之心亦有是易地有是簡吾之身亦有是簡與天地參而為三矣易中三才成其六位者此也理得成位即致中和天地位萬物育之意賢人即聖人與天地並而為三非聖人而何

右第一章 此章天尊地卑一條言天地對待之體剛柔相摩一條言天地流行之用乾以易知

一條則言人成位乎天地之中成位乎中則天地之體用模寫于易者神而明之皆存乎其人矣此三條孔子原易之所由作通未說到易上去至第二章設卦觀象方言易

聖人設卦觀象繫辭焉而明吉凶剛柔相推而生變化設卦者文王周公將伏羲圓圖六十四卦陳列也象者物之似總之有一卦之象析之有六爻之象觀此象而繫之以辭以明一卦一爻之吉凶剛柔相推者

卦爻陰陽迭相為推也柔不一于柔柔有時而窮則自陰以推于陽而變生矣剛不一于剛剛有時而窮則自陽以推于陰而化生矣如乾之初九交于坤之初六則為震坤之初六交于乾之初九則為巽此類是也又如夬極而乾矣反下而又為姤剝極而坤矣反下而又為復此類是也易之為道不過辭變象占四者而已吉凶者占也占以辭而明故繫辭焉而明吉凶剛柔相推者象也變由象而出故剛柔相推而



生變化

是故吉凶者失得之象也悔吝者憂虞之象也變化者  
進退之象也剛柔者晝夜之象也六爻之動三極之道  
也

是故者因上文也吉凶悔吝以卦辭言失得憂虞以  
人事言易言吉凶在人為失得之象易言悔吝在人  
為憂虞之象蓋人之行事順理則得逆理則失故辭  
有吉凶即人事失得之象虞者樂也憂則困心衡慮

漸趨于吉亦如悔之自凶而趨吉也虞則志得意滿  
漸向于凶亦如吝之自吉而向凶也所以悔吝即憂  
虞之象所謂觀象繫辭以明吉凶者此也變化剛柔  
以卦畫言進退晝夜以造化言柔變乎剛進之象剛  
化乎柔退之象進者息而盈也退者消而虛也剛屬  
陽明畫之象柔屬陰暗夜之象進退無常故變化者  
進退之象晝夜一定故剛柔者晝夜之象三者三才  
也地位人位天位也三才即六爻分之則六爻總之

則三才極至也爻不極則不變動陽極則陰陰極則陽言六爻之變動者乃三才極至之道理如此也故曰道有變動曰爻所謂剛柔相推而生變化者此也六爻之動二句言變化之故

是故君子所居而安者易之序也所樂而玩者爻之辭也

上二節言聖人作易之事此二節則教人之學易也居者處也安者處而不遷樂者悅樂也玩者悅樂而

反覆玩味序者文王序卦也所居而安者文王六十  
四卦之序所樂而玩者周公三百八十四爻之辭文  
王序卦有錯有綜變化無窮若可遷移矣然文王本  
其自然之畫而定之非有心安排也故不可遷移如  
乾止可與坤相錯不可與別卦相錯故孔子雜卦曰  
乾剛坤柔屯止可與蒙相綜不可與別卦相綜故孔  
子雜卦曰屯見而不失其居蒙雜而著故處而不遷  
此則教人學文王序卦學周公爻辭

是故君子居則觀其象而玩其辭動則觀其變而玩其占是以自天祐之吉无不利

辭因象而繫占因變而決靜而未卜筮時易之所有者象與辭也動而方卜筮時易之所有者變與占也易之道一陰一陽即天道也如此觀玩則所趨皆吉所避皆凶靜與天俱動與天游冥冥之中若或助之矣故自天祐之吉无不利變即上變也言變則化在其中此則教人學文王周公辭變象占

右第二章 此章言聖人作易君子學易之事

象者言乎象者也爻者言乎變者也吉凶者言乎其失得也悔吝者言乎其小疵也无咎者善補過也

象謂卦辭文王所作者爻謂爻辭周公所作者象指全體而言乃一卦之所具者如元亨利貞則言一卦純陽之象變指一節而言乃一爻之所具者如潛龍勿用則言初陽在下之變凡言動之間盡善之謂得不盡善之謂失小不善之謂疵不明乎善而誤于不

善之謂過覺其小不善非不欲改而彼時未改于是乎有悔覺其小不善猶及于改而不能改或不肯改于是乎有吝悔未至于吉而猶有小疵吝未至于凶而已有小疵善者嘉也嘉其能補過也即上文言乎言字之例本有過而能圖回改復謂之補譬如衣有破處是過也帛則用帛補之布則用布補之此之謂補過吉凶失得之大不如悔吝之小悔吝疵病之小又不如无咎之為善○彖言象爻言變則吉凶悔吝

无咎之辭皆備矣故吉凶者言乎卦爻中之失得也  
悔吝者言乎卦爻中之小疵也无咎者善乎卦爻中  
之能補過也此釋彖爻之名義又釋吉凶悔吝无咎  
之名義也

是故列貴賤者存乎位齊大小者存乎卦辯吉凶者存  
乎辭憂悔吝者存乎介震无咎者存乎悔是故卦有小  
大辭有險易辭也者各指其所之

上文釋卦爻吉凶悔吝无咎之名義矣此則教人體



卦爻吉凶悔吝无咎之功夫也五存應四言一善列  
貴賤句應爻者言乎其變齊大小句應象者言乎其  
象列者分列也六爻上體為貴下體為賤齊者等也  
等分大小也陽大陰小陽大為主者復臨泰之類也  
陰小為主者姤遯否之類也小往大來大往小來皆  
其類也介者分也震者動也大小即所齊之大小也  
險易者即卦爻辭之險易也險者暗昧而艱深如文  
王卦辭履虎尾先甲後甲之類周公爻辭其人天且

剽入于左腹之類是也易者明白而平易如文王卦辭謙君子有終漸女歸吉之類周公爻辭師左次同人于門之類是也之者往也各者吉凶悔吝无咎五者各不同也各指其所之者各指其所往之地也○言爻固言乎其變矣若列貴賤則存乎所變之位不可貴賤混淆象固言乎其象矣若齊大小則存乎所象之卦不可大小紊亂吉凶固言乎失得矣若辨吉凶則存乎其辭辭吉則趨之辭凶則避之悔吝固言

乎小疵矣然不可以小疵而自恕必當于此心方動  
善惡初分幾微之時即憂之則不至于悔吝矣无咎  
固補過矣然欲動補過之心者必自悔中來也是故  
卦與辭雖有大小險易之不同然皆各指于所徃之  
地如吉凶則趨之避之如悔吝則憂乎其介如无咎  
存乎悔也此則教人觀玩體卦爻吉凶悔吝无咎之  
功夫也

右第三章

此章教人觀玩之事故先釋卦爻並

吉凶悔吝无咎五者之名義而後教人體此卦  
爻並五者功夫也

易與天地準故能彌綸天地之道

準者均平也言易之書與天地均平也彌者彌縫包  
括周密合萬為一而渾然無欠即下文範圍之意綸  
者絲綸條理分明析一為萬而燦然有倫即下文曲  
成之意彌綸天地者如以乾卦言為天為圜以至為  
木果即一卦而八卦可知矣如以乾卦初爻潛龍言

在君得之則當傳位在臣得之則當退休在士得之則當靜修在商賈得之則當待價在女子得之則當愆期在將帥得之則當左次即一爻而三百八十四爻可知矣豈不彌綸天地

仰以觀於天文俯以察於地理是故知幽明之故原始反終故知死生之說精氣為物游魂為變是故知鬼神之情狀

天垂象有文章地之山川原隰各有條理陽極而陰

生則漸幽陰極而陽生則漸明一日之天地如此終古之天地亦如此故者所以然之理也人物之始此陰陽之氣人物之終此陰陽之氣其始也氣聚而理隨以完故生其終也氣散而理隨以盡故死說者死生乃人之常談也人之陰神曰魄耳目之聰明是也人之陽神曰魂口鼻之呼吸是也死則謂之魂魄生則謂之精氣天地之所公共者謂之鬼神陰精陽氣聚而成物則自無而向于有乃陰之變陽神之伸也

魂游魄降散而為變則自有而向于無乃陽之變陰  
鬼之歸也情狀猶言模樣○易與天地準者非聖人  
安排穿鑿強與為準也蓋易以道陰陽陰陽之道不  
過幽明死生鬼神之理而已今作易聖人仰觀俯察  
知幽明之故原始反終知死生之說知鬼神之所以  
為鬼神者乃精氣為物游魂為變也故能知其情狀  
夫天地之道不過一幽一明一死一生一鬼一神而  
已而作易聖人皆有以知之此所以易與天地準也

與天地相似故不違知周乎萬物而道濟天下故不過  
旁行而不流樂天知命故不憂安土敦乎仁故能愛

周知

智音

相似即不違下文不過不憂能愛皆不違之事知周  
乎萬物者聰明睿知足以有臨所以道濟天下也不  
過雖指天地若以聖人論乃道濟天下德澤無窮舉  
天下不能過也如言天下莫能載焉之意與下文不  
過不同旁行者行權也不流者不失乎常經也天以



理言仁義忠信是也命以氣言吉凶禍福是也樂天  
理則內重外輕又知命則惟修身以俟所以不憂如  
困于陳蔡夢奠兩楹援琴執杖而歌是也隨寓而安  
乎土胸中無爾我町畦又隨寓而敷篤乎仁所行者  
皆立人達人之事所以能愛不過不憂能愛皆指天  
地言至大不能過者天地之體不憂者天地之性能  
愛者天地之情天地之道不過如此而已故以此三  
者言之萬物天下協不過二字樂字協不憂二字仁

字協愛字○此言聖人與天地準也言聖人于天地之道豈特如上文知之哉聖人即與天地相似也惟其與天地相似故聖人之道皆不違乎天地矣何也天地至大無外不能過者也聖人則知周乎萬物而道濟天下故與天地相似同其不過天地無心而成化鼓萬物而不與聖人同憂不憂者也聖人則旁行不流樂天知命故與天地相似同其不憂天地以生物為心能愛者也聖人則安土敦仁故與天地相似

同其能愛是三者皆與天地相似者也惟其相似所以作易與天地準也

範圍天地之化而不過曲成萬物而不遺通乎晝夜之道而知故神无方而易无體

範如人範金使成形器圍如人墻圍使有界止化者天地之變化也天地陰而陽陽而陰本無遮闌本無窮盡聖人則範圍之範圍即裁成天地之道治厯明時體國經野之類是也不過者不使之過也曲成萬

物如教之養之大以成大小以成小之類是也通者  
達也通達乎晝夜之道而知之也晝夜即幽明死生  
鬼神也神指聖人即聖而不可知之謂神易指易書  
無方所無形體皆謂無形迹也○聖人既與天地相  
似故易能彌天地之道聖人則範圍天地而不過亦  
能彌之易能綸天地之道聖人則曲成萬物而不遺  
亦能綸之易書所具不過幽明死生鬼神之理也聖  
人則通乎晝夜之道而知亦能知幽明死生鬼神故

聖則无方而易則无體易與天地準者因作易聖人亦與天地準也

右第四章 此章言易與天地準者因作易聖人亦與天地準也

一陰一陽之謂道

理乘氣機以出入一陰一陽氣之散殊即太極之理各足而富有者也氣之迭運即太極之理流行而日新者也故謂之道

繼之者善也成之者性也仁者見之謂之仁知者見之

謂之知百姓日用而不知故君子之道鮮矣

見音現  
知音智

繼是接續不息之意書言帝降中庸言天命氣之方  
行正所降所命之時人物之所公共之者也此指人  
物未生造化流行上言之蓋靜之終動之始靜極復  
動則貞而又繼之以元元乃善之長此繼之者所以  
善也以其天命之本體不雜于形氣之私故曰善成  
是凝成有主之意氣以成形而理亦賦焉乃人物所

各足之者也。因物物各得其太極無妄之理，不相假借。故曰性見發見也。仁者知者即君子。○此一陰一陽之道，若以天人賦受之界言之，繼之者善也，成之者性也。此所以謂之道也。雖曰善曰性，然具于人身，渾然一理，無聲無臭，不可以名狀。惟仁者發見于惻隱，則謂之仁；知者發見于是非，則謂之知。而後所謂善性者，方有名狀也。故百姓雖與君子同具此善性之理，但為形氣所拘，物欲所蔽，而知君子仁知之道。

者鮮矣

顯諸仁藏諸用鼓萬物而不與聖人同憂盛德大業至矣哉富有之謂大業日新之謂盛德

仁者造化之心用者造化之功仁本在內者也如春夏之生長萬物是顯諸仁用本在外者也如秋冬之收斂萬物是藏諸用春夏是顯秋冬所藏之仁秋冬是藏春夏所顯之用仁曰顯用曰藏互言之也不憂者乾以易知坤以簡能無心而成化有何所憂富有



者無物不有而無一毫之虧欠日新者無時不然而無一毫之間斷天地以生物為德以成物為業○此一陰一陽之道若以天地言之自其氣之嘘也則自內而外顯諸其仁自其氣之吸也則自外而內藏諸其用然天地無心而成化雖鼓萬物出入之機而不與聖人同憂此所以盛德大業不可復加也富有日新乃德業之實此一陰一陽之道在天地者也

生生之謂易成象之謂乾效法之謂坤極數知來之謂

占通變之謂事陰陽不測之謂神

效法者承天時行惟效法之而已極數者方卜筮之時究極其陰陽七八九六之數觀其所值何卦所值何爻以斷天下之疑故曰占通變者既卜筮之後詳通其陰陽老少之變吉則趨之凶則避之以定天下之業故曰事以其理之當然而言曰道以其道之不測而言謂之神非道外有神也○此一陰一陽之道若以易論之陽生陰陰生陽消息盈虛始終代謝其

變無窮此則一陰一陽之道在易書易之所由名者  
此也聖人作易之初不過此陰陽二畫然乾本陽而  
名為乾者以其健而成象故謂之乾坤本陰而名為  
坤者以其順而效法故謂之坤此則一陰一陽之道  
在卦者也故究極此一陰一陽之數以知來則謂之  
占詳通其一陰一陽之變以行事則謂之事此則一  
陰一陽之道在卜筮者也若其兩在不測則謂之神  
蓋此一陰一陽之道其見之于人則謂之仁知見之

于天地則謂之德業見之于易則謂之乾坤占事人皆得而測之惟言陽矣而陽之中未嘗無陰言陰矣而陰之中未嘗無陽兩在不測則非天下之至神不能與于此矣故又以神贊之

右第五章 此章言一陰一陽之道不可名狀其在人則謂之仁知在天地則謂之德業在易則謂之乾坤占事而終贊其神也通章十一箇謂字相同一陰一陽貫到底

夫易廣矣大矣以言乎遠則不禦以言乎邇則靜而正以言乎天地之間則備矣

廣言其中之所含大言其外之所包不禦者無遠不到而莫之止也靜者無安布置之擾也正者六十四卦皆利于正也備者無所不有也下三句正形容廣大○夫易廣矣大矣何也蓋易道不外乎陰陽而陰陽之理則遍體乎事物以遠言其理則天高而莫禦以邇言其理則地靜而不偏以天地之間而言則

萬事萬物之理無不備矣此易所以廣大也

夫乾其靜也專其動也直是以大生焉夫坤其靜也翕其動也闢是以廣生焉

天地者乾坤之形體乾坤者天地之情性專者專一而不他直者直遂而不撓翕者舉萬物之生意而收斂于內也闢者舉萬物之生意而發散于外也乾之性健一而實故以質言而曰大大者天足以包乎地之形也坤之性順二而虛故以量言而曰廣廣者地

足以容乎天之氣也動者乾坤之相交也○易之所  
以廣大者一本于乾坤而得之也蓋乾畫奇不變則  
其靜也專變則其動也直坤畫偶不變則其靜也翕  
變則其動也闢是以大生廣生焉易不過模寫乾坤  
之理易道之廣大其原蓋出于此

廣大配天地變通配四時陰陽之義配日月易簡之善  
配至德

配者相似也非配合也變通者陰變而通于陽陽變

而通乎陰也。義者名義也。卦爻中剛者稱陽，柔者稱陰。故曰：義易簡者，健順也。至德者，仁義禮。知天所賦于人之理而我得之者也。仁禮屬健，義知屬順。○易之廣大得于乾坤則易，即乾坤矣。由此觀之，可見易之廣大亦如天地之廣大，易之變通亦如四時之變通。易所言陰陽之義與日月之陰陽相似，易所言易簡之善與聖人之至德相似。所謂遠不禦而近靜正，天地之間悉備者在是矣。此易所以廣大也。



右第六章 此章言易廣大配天地

子曰易其至矣乎夫易聖人所以崇德而廣業也知崇禮卑崇效天卑法地天地設位而易行乎其中矣成性存存道義之門

子曰二字後人所加窮理則知崇如天而德崇循理則禮卑如地而業廣蓋知識貴乎高明踐履貴乎著實崇效天則與乾知大始者同其知所謂洋洋發育萬物峻極于天者皆其知之崇也禮卑法地則與坤

作成物者同其能所謂優優大哉三千三百者皆其禮之卑也天清地濁知陽禮陰天地設位而知陽禮陰之道即行乎其中矣易字即知禮也知禮在人則謂之性而所發則道義也門者言道義從此出也○此言聖人以易而崇德廣業見易之所以為至也蓋六十四卦三百八十四爻皆理之所在也聖人以是理窮之于心則識見超邁日進于高明而其知也崇循是理而行則功夫敦篤日就于平實而其禮也卑

崇效乎天則崇之至矣故德崇卑法乎地則卑之至矣故業廣所以然者非聖人勉強效法乎天地也蓋天地設位而知陽禮陰之道已行乎其中矣其在人也則謂之成性渾然天成乃人之良知良能非有所造作而然也聖人特能存之耳今聖人知崇如天則成性之良知已存矣禮卑如地則成性之良能又存矣存之又存是以道義之得于心為德見于事為業者自然日新月盛不期崇而自崇不期廣而自廣矣

聖人崇德廣業以此此易所以為至也

右第七章 此章言聖人以易崇德廣業見易之

所以至也

聖人有以見天下之賾而擬諸其形容象其物宜是故謂之象

賾者口旁也養也人之飲食在口者朝夕不可缺則人事之至多者莫多于口中日用之飲食也故曰聖人見天下之賾賾蓋事物至多之象也若以雜亂釋

之又犯了下面亂字不如以口釋之則于厭惡字親切擬諸形容乾為園坤為大輿之類象其物宜乾稱龍坤稱牝馬之類二其字皆指贖

聖人有以見天下之動而觀其會通以行其典禮繫辭焉以斷其吉凶是故謂之爻

觀其會通全在天下之動上言未著在易上去會者事勢之湊合難通者也即嘉會足以合禮會字但嘉會乃嘉美之會有善而無惡此則有善惡于其間典

禮即合禮之禮蓋通即典禮所存以事勢而言則曰  
通以聖人常法而言則曰典禮典者常法也禮即天  
理之節文也如大禹揖遜與傅子二者相湊合此會  
也然天下謳歌等皆歸之子此通也若復揖遜不通  
矣則傅子者乃行其典禮也湯武君與民二者相湊  
合此會也然生民塗炭當救其民順天應人此通也  
若順其君不救其民不通矣則誅君者乃行其典禮  
也所以周公三百八十四爻皆是見天下之動觀其

會通以行其典禮方繫辭以斷其吉凶如剝卦五爻  
陰欲剝陽陰陽二者相湊合而難通者也然本卦有  
順而止之之義此通也合于典禮者也則繫貫魚以  
宮人寵之辭無不利而吉矣離卦四爻兩火相接下  
三爻炎上下五爻又君位難犯此二火湊合而難通  
者也然本卦再無可通之處此悖于典禮者也則繫  
死如弃如之辭無所容而凶矣

言天下之至賾而不可惡也言天下之至動而不可亂

也擬之而後言議之而後動擬議以成其變化

惡鳥路反

言助語辭惡厭也朝此飲食暮此飲食月此飲食年此飲食得之則生不得則死何常厭惡既見天下之賸以立其象是以不惟賸雖言天下之至賸而不可惡也既見天下之動以立其爻是以不惟動雖言天下之至動而不可亂也蓋事雖至賸而理則至一事雖至動而理則至靜故賸雖可惡而象之理犁然當于心則不可惡也動雖可亂而爻之理井然有條貫



則不可亂也是以學易者比擬其所立之象以出言則言之淺深詳畧自各當其理商議其所變之爻以制動則動之仕止久速自各當其時夫變化者易之道也既擬易後言詳易後動則語默動靜皆中于道易之變化不在其易而成于吾身矣故舉鶴鳴以下七爻皆擬議之事以為三百八十四爻之凡例云

鳴鶴在陰其子和之我有好爵吾與爾靡之子曰君子居其室出其言善則千里之外應之况其邇者乎居其

室出其言不善則千里之外違之况其邇者乎言出乎身加乎民行發乎邇見乎遠言行君子之樞機樞機之發榮辱之主也言行君子之所以動天地也可不慎乎

和胡卧反靡音糜行  
下孟反見賢邇反

釋中孚九二義以此擬議于言行亦如乾坤之文言也但多錯簡詳見後篇考定居室在陰之象出言鶴鳴之象千里之外應之子之和之象言者心之聲出乎身加乎民行者心之迹發乎邇見乎遠此四句好爵

爾靡之象戶以樞為主樞動而戶之闢有明有暗弩  
以機為主而弩之發或中或否亦猶言之出行之發  
有榮有辱也應雖在人而感召之者則在我是彼為  
賓而我為主也故曰榮辱之主動天地者言不特榮  
在我也言行感召之和氣足以致天地之祥不特辱  
在我也言行感召之乖氣足以致天地之異如景公  
發言善而熒惑退舍東海孝婦含冤而三年不雨是  
也言行一發有榮有辱推而極之動天地者亦此安

得不慎所以擬議而後言動者以此

同人先號咷而後笑子曰君子之道或出或處或默或語二人同心其利斷金同心之言其臭如蘭

釋同人九五爻義以擬議于異同爻辭本言始異終同孔子則釋以迹異心同也斷金者物不能間也言利刃斷物雖堅金亦可斷不能阻隔也如蘭者氣味之相投言之相入如蘭之馨香也○同人以同為貴而乃言號咷而後笑者何也蓋君子之出處語默其

迹迥乎不同矣然自其心觀之皆各適于義成就一箇是而已迹雖不同而心則同故物不能間而言之有味宜乎相信而笑也

初六藉用白茅无咎子曰苟錯諸地而可矣藉之用茅何咎之有慎之至也夫茅之為物薄而用可重也慎斯術也以往其无所失矣

釋大過初六爻義以擬議于敬慎錯置也置物者不過求其安今置之于地亦可以為安矣而又承藉之

以茅則益有憑藉安得有傾覆之咎故无咎者以其慎之至也夫茅之為物至薄之物也今不以薄而忽之以之而獲无咎之善是其用則重矣當大過之時以至薄之物而有可用之重此慎之之術也慎得此術以往百凡天下之事又有何咎而失哉孔子教人以慎術即孟子教人以仁術

勞謙君子有終吉子曰勞而不伐有功而不德厚之至也語以其功下人者也德言盛禮言恭謙也者致恭以

存其位者也

釋謙九三爻義以擬議人之處功名勞者功之未成  
功者勞之已著不德者不以我有功而為德也厚者  
渾厚不薄之意厚之至據其理而贊之非言九三也  
語者言也以功下人者言厚之至不過以功下人也  
以功下人即勞而不伐有功而不德也德者及人之  
德即功勞也德欲及人常有餘禮欲視已常不足言  
者言從來如此說也勞謙則兼此二者矣○人臣以

寵利居成功所以鮮克有終九三勞謙君子有終吉者何也蓋人臣勞而不伐有功而不德此必罷度識量有大過人者故為厚之至夫厚之至者不過言其以功下人耳知此可以論九三矣何也蓋人之言德者必言盛人之言禮者必言恭今九三勞則德盛矣謙則禮恭矣德盛禮恭本君子修身之事非有心為保其祿位而強為乎此也然致恭則人不與爭勞爭功豈不永保斯位所以勞謙有終吉者以此



亢龍有悔子曰貴而无位高而无民賢人在下位而无輔是以動而有悔也

重出

不出戶庭无咎子曰亂之所生也則言語以為階君不密則失臣臣不密則失身幾事不密則害成是以君子慎密而不出也

釋節初九爻義以擬議人之慎言語亂即下文失臣失身害成也君不密如唐高宗告武后以上官儀教

我廢汝是也臣不密如陳蕃乞宣臣章以示宦者是也幾者事之始成者事之終始韓琦處任守忠之事歐陽脩曰韓公必自有說此密幾事也○不出戶庭无咎何也蓋亂之所生皆言語以為階如君之言語不密則害及其臣謀以弭禍而反以嫁禍于臣臣之言語不密則害及于身謀以除害而反得反噬之害不特君臣為然凡天下之事有關於成敗而不可告人者一或不密則害成言語者一身之戶庭君子慎

密不出戶庭者以此

子曰作易者其知盜乎易曰負且乘致寇至負也者小人之事也乘也者君子之器也小人而乘君子之器盜斯奪之矣上慢下暴盜斯伐之矣慢藏誨盜冶容誨淫易曰負且乘致寇至盜之招也

釋解六三爻義以擬議小人竊高位聖人作易以盡情偽故言知盜思者雖未奪而思奪之也上慢者慢其上不忠其君下暴者暴其下不仁其民四盜字皆

言寇盜誨盜之盜活字偷也治者妖治也粧飾妖治  
其容也此二句皆指坎也坎為盜為淫故象卦言見  
金夫不有躬又言寇也盜之招即自我致口○作易  
者其知致盜之由乎易曰負且乘致寇至夫負本小  
人之事而乘則君子之名罷小人而乘君子之名罷  
盜必思奪之矣何也蓋小人竊位必不忠不仁盜豈  
不思奪而伐之然奪伐雖由于盜而致其奪伐者實  
由自暴慢有以誨之亦猶慢藏誨盜冶容誨淫也易

之言正招盜而誨之之意也作易者不歸罪于盜而歸罪于招盜之人此所以知盜

右第八章 此章自中孚至此凡七乃孔子擬議之辭而為三百八十四爻之凡例亦不外乎隨處以慎其言動而已即七爻而三百八十四爻可類推矣

天一地二天三地四天五地六天七地八天九地十  
伏羲龍馬負圖有一至十之數人知河圖之數而不

知天地之數人知天地之數而不知何者屬天何者屬地故孔子即是圖而分屬之天陽其數奇故一三五七九屬天地陰其數偶故二四六八十屬地

天數五地數五五位相得而各有合天數二十有五地數三十凡天地之數五十有五此所以成變化而行鬼神也

天數五者一三五七九其位有五也地數五者二四六八十其位有五也五位者即五數也言此數在河

圖上下左右中央天地各五處之位也相得者一對  
二三對四六對七八對九五與十對乎中央如賓主  
對待相得也有合者一與六居北二與七居南三與  
八居東四與九居西五與十居中央皆奇偶同居如  
夫婦之陰陽配合也二十有五者一三五七九奇之  
所積也三十者二四六八十偶之所積也變者化之  
漸化者變之成一二三四五居于圖之內者生數也  
化之漸也變也六七八九十居于圖之外者成數也

化也變化者數也即下文知變化之道之變化也鬼  
神指下文卜筮而言即下文神德行其知神之所為  
之鬼神也故曰卜筮者先王所以使民信時日敬鬼  
神也非屈伸往來也言天地之數五十有五成變化  
而鬼神行乎其間所以卜筮而知人吉凶也故下文  
即言大衍之數乾坤之策四營成易也何以為生數  
成數此一節蓋孔子之圖說也皆就河圖而言河圖  
一六居北為水故水生于一而成于六所以一為生



數六為成數生者即其成之端倪成者即其生之結  
果二七居南為火三八居東為木四九居西為金五  
十居中央為土皆與一六同

大衍之數五十其用四十有九分而為二以象兩掛一  
以象三揲之以四以象四時歸奇於扚以象閏五歲再  
閏故再扚而後掛

衍與演同演者廣也衍者寬也其義相同言廣天地  
之數也大衍之數五十者著五十莖故曰五十也其

用四十有九者演數之法必除其一方筮之初右手  
取其一策反于櫝中是也分二者中分其筮數之全  
置左以半置右以半此則如兩儀之對待故曰以象  
兩也掛者懸其一于左手小指之間也三者三才也  
左為天右為地所掛之策象人故曰象三揲之以四  
者間數之也謂先置右手之策于一處而以右手四  
四數左手之策又置左手之策于一處而以左手四  
四數右手之策所以象春夏秋冬也奇者零也所揲

四數之餘也。劫者勒也。四四之後必有零數。或一或二或三或四。左手者歸之于第四。第三指之間。右手者歸之于第三。第二指之間。而劫之也。象閏者以其所歸之餘策而象日之餘也。五歲再閏者一年十二月氣盈六日。朔虛六日。共餘十二日。三年則餘三十六日。分三十日為一月。又以六日為後閏之積。其第四第五年又各餘十二日。以此二十四日湊前六日。又成一閏。此是五歲再閏也。掛一當一歲。揲左當二。

歲劫左則三歲一閏矣又揲右當四歲劫右則五歲再閏矣再劫而後掛者再劫之後復以所餘之著合而為一為第二變再分再掛再揲也獨言著者分二揲四皆在其中矣此則象再閏也

乾之策二百一十有六坤之策百四十有四凡三百有六十當期之日二篇之策萬有一千五百二十當萬物之數也

期音基

策者乾坤老陽老陰過揲之策數也乾九坤六以四

營之乾則四九三十六坤則四六二十四乾每一爻  
得三十六則六爻得二百一十有六矣坤每一爻得  
二十四則六爻得百四十有四矣當期之數者當一  
年之數也當者適相當也非以彼準此也若以乾坤  
之策三百八十四爻總論之陽爻百九十二每一爻  
三十六得六千九百一十二策陰爻百九十二每一  
爻二十四得四千六百八策合之萬有一千五百二  
十當萬物之數也

是故四營而成易十有八變而成卦八卦而小成引而伸之觸類而長之天下之能事畢矣顯道神德行是故可與酬酢可與祐神矣子曰知變化之道者其知神之所為乎

上文言數此則總言卦筮引伸觸類之無窮也營者求也四營者以四而求之也如老陽數九以四求之則其策三十有六老陰數六以四求之則其策二十有八少陽數七以四求之則其策二十有八少陰數

八以四求之則其策三十有二陰陽老少六爻之本  
故曰四營而成易十有八變而成卦者三變成一爻  
十八變則成六爻矣八卦者乾坎艮震之陽卦巽離  
坤兌之陰卦也言聖人作易止有此八卦亦不過小  
成而已不足以盡天下之能事也惟引此八卦而伸  
之成六十四卦如乾為天風姤坤為地雷復之  
類觸此八卦之類而長之如乾為天為園坤為地為  
母之類則吉凶趨避之理悉備于中天下之能事畢

矣能事者下文顯道神德行酬酢祐神所能之事也  
道者吉凶消長進退存亡之道即天下能事之理德  
行者趨避之見于躬行實踐即天下能事之迹道隱  
于無不能以自顯惟有筮卦之辭則其理昭然于人  
不隱于茫昧矣德滯于有不能以自神惟人取決于  
筮則趨之避之民咸用以出入莫測其機緘矣惟其  
顯道神德行則受命如嚮可以酬酢萬變如賓主之  
相應對故可與酬酢神不能自言吉凶與人惟有著



卦之辭則代鬼神之言而祐助其不及故可與祐神  
不惟明有功于人而且幽有功于神天下之能事豈  
不畢變化者即上文著卦之變化也兩在不測人莫  
得而知之故曰神言此數出于天地天地不得而知  
也模寫于著卦聖人不得而知也故以神贊之子曰  
二字後人所加也

右第九章 此章言天地筮卦之數而贊其為神  
也

易有聖人之道四焉以言者尚其辭以動者尚其變以制器者尚其象以卜筮者尚其占

易之為道不過辭變象占四者而已以者用也尚者取也辭者彖辭也如乾元亨利貞是也問焉而以言者尚之則知其元亨知其當利于貞矣變者爻變也動者動作營為也尚變者主于所變之爻也制器者結繩網罟之類是也尚象者網罟有離之象是也占者占辭也卜得初九潛龍則尚其勿用之占是也

是以君子將有為也將有行也問焉而以言其受命也如嚮无有遠近幽深遂知來物非天下之至精其孰能

與於此

嚮去聲

此尚辭之事問即命也受命者受其問也以言二字應以言者尚其辭謂發言處事也未有有為有行而靜默不言者嚮者向也即嚮明而治之嚮也言如彼此相向之近而受命親切也遠而天下後世近而瞬息戶階幽則其事不明深則其事不淺來物未來之吉

凶也精者潔淨精微也○君子將有為有行問之  
于易易則受其問如對面問答之親切以決未來之  
吉凶遠近幽深無不周悉非其辭之至精孰能與此  
故以言者尚其辭

參伍以變錯綜其數通其變遂成天地之文極其數遂  
定天下之象非天下之至變其孰能與於此

此尚變尚象之事參伍錯綜皆古語三人相雜曰參  
五人相雜曰伍參伍以變者此借字以言著之變乃

分揲掛扐之形容也蓋十八變之時或多或寡或前  
或後彼此相雜有參伍之形容故以參伍言之錯者  
陰陽相對陽錯其陰陰錯其陽也如伏羲圓圖乾錯  
坤坎錯離八卦相錯是也綜即今織布帛之綜一上  
一下者也如屯蒙之類本是一卦在下則為屯在上  
則為蒙載之文王序卦者是也天地二字即陰陽二  
字成文者成陰陽老少之文也蓋奇偶之中有陰陽  
純雜之中有老少陽之老少即天之文陰之老少即

地之文物相雜故曰文即此文也定天下之象者如  
乾坤相錯則乾馬坤牛之類各有象震艮相綜則震  
雷艮山之類各有其象是也變者象之未定象者變  
之已成故象與變二者不雜著卦亦不相雜故參伍  
言著錯綜言卦所以十一章言圓而神即言方以知  
也○參伍其著之變錯綜其卦之數通之極之而成  
文成象則奇偶老少不滯于一端內外貞悔不膠于  
一定而變化無窮矣非天下之至變其孰能與于此

故以動者尚其變以制器者尚其象

易无思也无為也寂然不動感而遂通天下之故非天下之至神其孰能與於此

此言尚占之事易者卜筮也著乃草無心情之物故曰無思龜雖有心情然無所作為故曰無為無心情無作為則寂然而靜至蠢不動之物矣故曰寂然不動感者人問卜筮也通天下之故者知吉凶禍福也此神字即是興神物之神上節就聖人辭上說故曰

精就著卦形容上說故曰變此章著與龜上說乃物也故曰神○凡天下之物有思有為其知識才能超出于萬物之表者方可以通天下之故也今著龜無思無為不過一物而已然方感矣而遂能通天下之故未嘗遲回于其間非天下之至神乎所以以卜筮者尚其占觀下文唯神也三字可見

夫易聖人所以極深而研幾也唯深也故能通天下之志唯幾也故能成天下之務唯神也故不疾而速不行



而至于曰易有聖人之道四焉者此之謂也

極深者究極其精深也探賾索隱鉤深致遠通神明  
之德類萬物之情知幽明死生鬼神之情狀是也研  
幾者研審其幾微也履霜而知堅冰之至剝足而知  
蔑貞之凶之類是也唯精故極深未有極深而不至  
精者唯變故研幾未有知幾而不通變者通天下之  
志即發言處事受命如嚮也成天下之務即舉動制  
器成文成象也不疾不行即寂然不動而速而至即

感而遂通天下之故也○總以辭變象占四者論之  
固至精至變至神矣然所謂精者以聖人極其深也  
惟深也故至精而能通天下之志所謂變者以聖人  
之研其幾也惟幾也故至變而能成天下之務著龜  
無思無為則非聖人之極深研幾矣惟神而已惟神  
也故寂然不動感而遂通天下之故不疾而速不行  
而至也夫至精至變至神皆聖人之道而易之辭變  
象占有之故易謂有聖人之道四者因此謂之四也

右第十章 此章論易有聖人之道四

子曰夫易何為者也夫易開物成務冒天下之道如斯而已者是故聖人以通天下之志以定天下之業以斷天下之疑

何為者問辭也如斯而已者答辭也物乃遂知來物之物吉凶之實理也開物者人所未知者開發之也務者趨避之事為人所欲為者也成者成就也冒天下之道者天下之道悉覆冒包括于卦爻之中也以

者以其易也易開物故物理未明易則明之以通天  
下之志易成務故事業未定易則定之以定天下之  
業易冒天下之道故志一通而心之疑決業一定而  
事之疑決以斷天下之疑

是故著之德圓而神卦之德方以知六爻之義易以貢  
聖人以此洗心退藏於密吉凶與民同患神以知來知  
以藏往其孰能與於此哉古之聰明叡知神武而不殺

者夫

神已知來知字平聲餘皆去  
聲易音亦與音預夫音符

圓者著數七七四十九象陽之圓也變化無方開于  
未卦之先可知來物故圓而神方者卦數八八六十  
四象陰之方也爻位各居定于有象之後可藏往事  
故方以知易者一圓一方交易變易屢遷不常也貢  
者獻也以吉凶陳獻于人也洗心者心之名也聖人  
之心無一毫人欲之私如江漢以濯之又神又知又  
應變無窮具此三者之德所以謂之洗心猶書言人  
心道心詩言遐心以及赤心古心機心皆其類也非

心有私而洗其心也退藏于密者此心未發也同患者同患其吉當趨凶當避也凡吉凶之幾兆端已發將至而未至者曰來吉凶之理見在于此一定而可知者曰往知來者先知也藏往者了然蘊畜于胸中也孰能與于此者問辭也古之聰明二句荅辭也人自畏服不殺之殺故曰神武○著之德圓而神筮以求之遂知來物所以能開物也卦之德方以知率而揆之具有典常所以能成務也六爻之義易以貢吉

凶存亡辭無不備所以能冒天下之道也聖人未畫卦之前已具此三者洗心之德則聖人即著卦六爻矣是以方其無事而未有吉凶之患則三德與之而俱寂退藏于密鬼神莫窺則著卦之無思無為寂然不動也及其吉凶之來與民同患之時則聖人洗心之神自足以知來洗心之智自足以藏往隨感而應即著卦之感而遂通天下之故也此則用神而不用著用智而不用卦無卜筮而知吉凶孰能與于此哉

惟古之聖人聰明睿智具著卦之理而不假于著卦之物猶神武自足以服人不假于殺伐之威者方足以當之也此聖人之心易乃作易之本

是以明于天之道而察于民之故是興神物以前民用聖人以此齋戒以神明其德夫

天道者陰陽剛柔盈虛消長自有吉凶其道本如是也民故者愛惡情偽相攻相感吉凶生焉此其故也神物者著龜也興者起而用之即齋戒以神明其德



也前民用即通志成務斷疑也卜筮在前民用在後  
故曰前齋戒者敬也著龜之德無思無為寂然不動  
感而遂通天下之故乃天下之至神者故曰神明聖  
人不興起而敬之百姓褻而弗用安知其神明聖人  
敬之則著龜之德本神明而聖人有以神明其德矣  
○聖人惟其聰明睿智是以明于天之道而察于民  
之故恐人不知天道民故之吉凶所當趨避也于是  
是興神物以前民用使其當趨則趨當避則避又恐

其民之褻也聖人敬而信之以神明其德是以民皆敬信而神明之前民用而民用不窮矣

是故闔戶謂之坤闢戶謂之乾一闔一闢謂之變往來不窮謂之通見乃謂之象形乃謂之器制而用之謂之法利用出入民咸用之謂之神

二氣之機靜藏諸用動顯諸仁者易之乾與坤也二氣之運推遷不常相續不窮者易之變與通也此理之顯於其迹呈諸象數涉諸聲臭者易之象與器也

此道修于其教垂憲示人百姓不知者易之法與神也乃者二氣之理也○聖人明于天之道而察于民之故固興神物以前民用矣百姓見易之神明以為易深遠而難知也而豈終不易知哉是故易有乾坤有變通有形象有法神即今取此戶譬之戶一也闔之則謂之坤闢之則謂之乾又能闔又能闢一動一靜不膠固于一定則謂之變既闔矣而復闢既闢矣而復闔往來相續不窮則謂之通得見此戶則涉于

有迹非無聲無臭之可比矣則謂之象既有形象必有規矩方圓則謂之器古之聖人制上棟下宇之時即有此戶則謂之法度利此戶之用一出入百姓日用而不知則謂之神即一戶而易之理已在目前矣易雖神明豈深遠難知者哉

是故易有太極是生兩儀兩儀生四象四象生八卦八卦定吉凶吉凶生大業

太極者至極之理也理寓于象數之中難以名狀故

曰太極生者加一倍法也兩儀者畫一奇以象陽畫一偶以象陰為陰陽之儀也四象者一陰之上加一陰為太陰加一陽為少陽一陽之上加一陽為太陽加一陰為少陰陰陽各自老少有此四者之象也八卦者四象之上又每一象之上各加一陰一陽為八卦也曰八卦即六十四卦也下文昔者包犧氏之王天下也始作八卦以通神明之德以類萬物之情曰神明萬物則天地間無所不包括矣如乾為天為圓

坤為地為母之類是也故六十四卦不過八卦變而成之如乾為天天風姤坤為地地雷復之類是也若邵子八分十六十六分三十二三十二分六十四不成其說矣定者通天下之志生者成天下之務蓋既有八卦則剛柔迭用九六相推時有消息位有當否故定吉凶吉凶既定則吉者趨之凶者避之變通盡利鼓舞盡神故生大業若無吉凶利害則人謀盡廢大業安得而生

是故法象莫大乎天地變通莫大乎四時縣象著明莫大乎日月崇高莫大乎富貴備物致用立成器以為天下利莫大乎聖人探賾索隱鉤深致遠以定天下之吉

凶成天下之亶亶者莫大乎著龜

縣音玄

天成象地效法之故曰法象萬物之生有顯有微皆法象也而莫大乎天地萬化之運終則有始皆變通也而莫大乎四時天文煥發皆懸象著明者而莫大乎日月崇高以位言貴為天子富有四海是也物天

地之所生者備以致用如服牛乘馬之類是也器乃人之所成者立成器以為天下利舟楫網罟之類是也凡天地間器物智者創之巧者述之如蔡倫之紙蒙恬之筆非不有用有利也但一節耳故莫大乎聖人事為之太多者曰蹟事幾之幽僻者曰隱理之不可測度者曰深事之不可驟至者曰遠探者討而理之索者尋而得之鉤者曲而取之致者推而極之四字雖不同然以著龜探之索之鉤之致之無非欲定



吉凶昭然也。疊疊者勉勉不已也。吉凶既定，示天下以從違之路。人自勉勉不已矣。此六者之功用皆大也。聖人欲借彼之大以形容著龜之大，故以著龜終焉。與毛詩比體相同。○上文闔戶一節，以易之理比諸天地間一物之小者，然豈特小者為然哉。至于天地間至大之功用，亦有相同者何也。蓋易有太極，是生兩儀，兩儀生四象，四象生八卦，八卦定吉凶，吉凶生大業。是大業也，所以成天下之疊疊者也。試以天

地之大者言之是故法象莫大乎天地變通莫大乎  
四時縣象著明莫大乎日月崇高莫大乎富貴備物  
致用立成器以為天下利莫大乎聖人此五者皆天  
地間至大莫能過者也若夫探賾索隱鉤深致遠以  
定天下之吉凶成天下之亹亹以生其大業者則莫  
大乎蓍龜夫以小而同諸一物之小大而同諸天地  
功用之大此易所以冒天下之道也

是故天生神物聖人則之天地變化聖人效之天垂象

見吉凶聖人象之河出圖洛出書聖人則之易有四象所以示也繫辭焉所以告也定之以吉凶所以斷也

神物者蓍龜也天變化者日月寒暑往來相推之類地變化者山峙川流萬物生長凋枯之類吉凶者日月星辰纏次循度晦明薄蝕也四象者天生神物之象天地變化之象垂象吉凶之象河圖洛書之象也○易之為道小而一戶大而天地四時日月富貴聖人無有不合易誠冒天下之道矣易道如此豈聖人

勉强自作哉蓋易之為書不過辭變象占四者而已  
故易有占非聖人自立其占也天生神物有自然之  
占聖人則之以立其占易有變非聖人自立其變也  
天地變化有自然之變聖人效之以立其變易有象  
非聖人自立其象也天垂象見吉凶有自然之象聖  
人象之以立其象易有辭非聖人自立其辭也河出  
圖洛出書有自然之文章聖人則之以立其辭因天  
地生此四象皆自然而然所以示聖人者至矣聖人

雖繫之以辭不過因此四象繫之以告乎人而已雖  
定之以吉凶不過因此四象定之以決斷其疑而已  
皆非聖人勉強自作也學易者能居則觀象玩辭動  
則觀變玩占易雖冒天下之道道不在易而在我矣  
右第十一章 此章言易開物成務冒天下之道  
然皆出于天地自然而非聖人勉強自作也  
易曰自天祐之吉无不利子曰祐者助也天之所助者  
順也人之所助者信也履信思乎順又以尚賢也是以

自天祐之吉无不利也

釋大有上九爻義天人一理故言天而即言人天之所助者順也順則不悖于理是以天祐之人之所助者信也信則不欺乎人是以人助之六五以順信居中上九位居六五之上是履信也身雖在上比乎君而心未常不在君是思乎順也上賢與大畜剛上而尚賢同言聖人在上也上九履信思順而六五又尚賢此所以自天祐之吉无不利也上九居天位天之

象應爻居人位人之象離中虛信之象中坤土順之  
象變震動思之象震為足上九乘乎五履之象

子曰書不盡言言不盡意然則聖人之意其不可見乎  
子曰聖人立象以盡意設卦以盡情偽繫辭焉以盡其  
言變而通之以盡利鼓之舞之以盡神

書本所以載言然書有限不足以盡無窮之言言本  
所以盡意然言有限不足以盡無窮之意立象者伏  
義畫一竒以象陽畫一偶以象陰也立象則大而天

地小而萬物精及無形粗及有象悉包括于其中矣  
本于性而善者情也拂乎性而不善者偽也偽則不  
情情則不偽人之情偽萬端非言可盡即卦中之陰  
陽淑慝也既立其象又設八卦因而重之為六十四  
以觀愛惡之相攻遠近之相取以盡其情偽文王周  
公又慮其不能觀象以得意也故又隨其卦之大小  
象之失得愛虞繫之辭以盡其言使夫人之觀象玩  
占者又可因言以得意而前聖之精蘊益以闡矣盡



意盡情偽盡言皆可以為天下利又恐其利有所未  
盡於是教人于卜筮中觀其卦爻所變即動則觀其  
變而玩其占也由是即其所占之事而行之通達即  
通變之謂事也下文化裁推行是也則其用不窮而  
足以盡利矣因變得占以定吉凶則民皆無疑而行  
事不倦如以鼓聲作舞容鼓聲疾舞容亦疾鼓聲不  
已而舞容亦不已自然而然不知其孰使之者所謂盡  
神也盡利者聖人立象設卦之功盡神者聖人繫辭

之功子曰宜衍其一○書不盡言言不盡意然則聖人之意終不可見乎蓋聖人仰觀俯察見天地之陰陽不外乎奇偶之象也于是立象以盡意然獨立其象則意中之所包猶未盡也于是設卦以盡意中情偽之所包立象設卦不繫之以辭則意中之所發猶未昭然明白也于是繫辭以盡其意中之所發立象設卦繫辭易之體已立矣于是教人卜筮觀其變而通之則有以成天下之務而其用不窮足以盡意中

之利矣由是斯民鼓之舞之以成天下之亶亶而其  
妙莫測足以盡意中之神矣至此意斯無餘蘊而聖  
人憂世覺民之心方于此乎遂也

乾坤其易之緼耶乾坤成列而易立乎其中矣乾坤毀  
則无以見易易不可見則乾坤或幾乎息矣

易者易書也緼者衣中所著之絮也乾坤其易之緼  
者謂乾坤緼于易六十四卦之中非謂易緼于乾坤  
兩卦之中也成列者一陰一陽對待也既有對待自

有變化毀謂卦畫不立息謂變化不行蓋易中所緼者皆九六也爻中之九皆乾爻中之六皆坤九六散布于二篇而為三百八十四爻則乾坤成列而易之本立乎其中矣易之所以為易者乾九坤六之變易也故九六毀不成列九獨是九六獨是六則無以見其為易易不可見則獨陽獨陰不變不化乾坤之用息矣乾坤未嘗毀未嘗息特以爻畫言之耳乾坤即九六若不下箇緼字就說在有形天地上去了

是故形而上者謂之道形而下者謂之器化而裁之謂之變推而行之謂之通舉而措之天下之民謂之事業道器不相離如有天地就有太極之理在裏面如有人身此軀體就有五性之理藏于此軀體之中所以孔子分形上形下不離形字也裂布曰裁田鼠化為鴛周宣王時馬化為狐化意自見矣化而裁之者如一歲裁為四時一時裁為三月一月裁為三十日一日裁為十二時是也推行者將已裁定者推行之也如

堯典分命羲和等事是化而裁之至敬授人時則推行矣通者達也如乾卦當潛而行潛之事則潛為通如行見之事則不通矣當見而行見之事則見為通如行潛之事則不通矣事者業之方行業者事之已著此五謂言天地間之正理聖人之教化禮樂刑賞皆不過此理至于下文六存方說卦又不然下文化而裁之二句說不去矣蓋謂者名也存者在也上文言化而裁之名曰變下文言化而裁之在乎其變字

意各不同說道理由精而及于粗故曰形而上者謂之道說卦爻由顯而至于微故曰默而成之存乎德行○陰陽之象皆形也形而上者超乎形器之上無聲無臭則理也故謂之道形而下者則囿于形器之下有色有象止于形而已故謂之器以是形而上下化而裁之則謂之變推而行之則謂之通及舉此變通措之天下之民則所以變所以通者皆成其事業矣故謂之事業此畫前之易也與卦爻不相干

是故夫象聖人有以見天下之賾而擬諸其形容象其物宜是故謂之象聖人有以見天下之動而觀其會通以行其典禮繫辭焉以斷其吉凶是故謂之爻

重出以起下文

極天下之賾者存乎卦鼓天下之動者存乎辭化而裁之存乎變推而行之存乎通神而明之存乎其人默而成之不言而信存乎德行

極究也賾多也天地萬物之形象千態萬狀至多而




難見也卦之象莫不窮究而形容之故曰極天下之  
賾者存乎卦鼓起也動酬酢往來也天地萬物之事  
理酬酢往來千變萬化至動而難以占決也爻之辭  
莫不發揚其故以決斷之故曰鼓天下之動者存乎  
辭卦即象也辭即爻也化裁者教人卜筮觀其卦爻  
所變如乾初爻一變則就此變化而以理裁度之為  
潛龍勿用乾卦本元亨利貞今曰勿用因有此變也  
故曰存乎變通者行之通達不阻滯也裁度已定當

推行矣今當勿用之時遂即勿用不泥于本卦之元亨利貞則行之通達不阻滯矣故曰存乎通神者運用之莫測明者發揮之極精下文默而成之不言而信是也無所作為謂之默曰默則不假諸極天下之賾之卦矣見諸辭說之謂言曰不言則不託諸鼓天下之動之辭矣成者我自成其變通之事也信者人自信之如著龜也與奏假無言時靡有爭同意○極天下之賾者存乎卦之象鼓天下之動者存乎爻之

辭此卦此辭化而裁之存乎其變推而行之存乎其  
通此本諸卦辭善于用易者也若夫不本諸卦辭神  
而明之則又存乎其人耳蓋有所為而後成有所言  
而後信皆非神明惟默而我自成之不言而人自信  
之此則生知安行聖人之能事也故曰存乎德行故  
有造化之易有易書之易有在人之易德行者在人  
之易也有德行以神明之則易不在造化不在四聖  
而在于我矣

右第十二章 此章論易書不盡言言不盡意而  
歸重于德行也



周易集註卷十三